

Headlines

1 प्रधानमंत्री नरेंद्र मोदी होर अपने जम्मू-कश्मीर दौरे दौरान 46 ज्हार करोड़ शा मती लागत दिये बक्ख-बक्ख विकास परियोजनाएं दा शुभारम्भ करडन। मोदी होर चनाब पुल ते अंजी खड्ड पुल दा उद्घाटन करडन ते द'ऊं बंदे भारत ट्रेनें गी झंडी दस्सियै रवाना करडन।

2 उपराज्यपाल मनोज सिन्हा होरें गलाया ऐ जे कश्मीर गी कन्याकुमारी कन्नै जोड़ने आहली उधमपुर-श्रीनगर-बारामूला रेल संपर्क जम्मू-कश्मीर लेई इक नमें युग दी शुरूआत करोग।

3 प्रधानमंत्री हुंदे जम्मू-कश्मीर दौरे थमां पैहले समूलचे खित्ते च सुरक्षा बंदोबस्त निगार कीते गे। एन-एच-44 उप्पर बी चौकसी बधाई गई।

4 संसद च बरसांती आहला इजलास औंदी 21 जुलाई थमां शुरू होग।

5 साउदी अरब च बड़ी भारी गर्मी दे उपायें दे लागू होने कन्नै गै 14 लक्ख शा मते हज यात्रियें हज शुरू कीता ऐ।

PM-Visit

प्रधानमंत्री नरेंद्र मोदी होर औंदी 6 जून गी जम्मू-कश्मीर दा दौरा लाडन ते 46 ज्हार करोड़ रपे दी लागत आहिलियें बक्ख-बक्ख विकासकारी परियोजनाएं गी राष्ट्र दे नमित्त करडन। प्रधानमंत्री हुंदे दफतरा चा जारी इक बयान मूजब जम्मू-कश्मीर च रेल दे बुनियादी ढांचे ते बेहतर राबते गी बढावा देने दे मद्देनजर प्रधानमंत्री होर चनाब रेल पुल ते अंजी खड्ड पुला दा उद्घाटन करडन। मोदी होर कटड़ा शां श्रीनगर जाने आहली 2 वंदे भारत ट्रेनें गी बी झंडी दस्सियै रवाना करडन। एहदे अलावा प्रधानमंत्री होर 272 किलोमीटर उधमपुर-श्रीनगर-बारामूला रेल लिक परियोजना दा बी शुभारम्भ करडन। मोदी होर रियासी जिले दे कटड़ा च बनने आहले पैहले मेडिकल कालेज श्री माता वैष्णो देवी इंस्टीच्यूट ऑफ मेडिकल एक्सीलेंस दा बी नीहू पत्थर रक्खडन जेड़ा खित्ते दे लोकें गी बेहतर सेहत स्थूलतां मुहैया कराग।



## LG-Rail Link

लेफ्टिनेंट गवर्नर मनोज सिन्हा होरें अज्ज आखेआ ऐ जे कश्मीर गी कन्याकुमारी कन्नै जोड़ने आह्ला उधमपुर-श्रीनगर-बारामूला रेल लिंक, केन्द्र शासित प्रदेश जम्मू-कश्मीर लेई इक नमें जुग दी शुरुआत करोगा। एलजी होरें आखेआ जे एह्दे राहें बपार-कारोबार, संपर्क ते विकास गतिविधिएं च बाद्दा होग। सिन्हा होरें जम्मू-कश्मीर च सकारात्मक तब्दीलिएं दा श्रेय प्रधानमंत्री नरेन्द्र मोदी होरेंगी दित्ता।

<><><><><><>

## People-Reaction

कटड़ा दे लोके च कटड़ा-श्रीनगर रेल संपर्क दे उद्घाटन शा पैहले गै बड़ा मता उत्साह दिक्खने गी लब्बा'रदा ऐ। इस परियोजना दा लोके गी लम्में चिरे थमां इंतजार हा ।

<><><><><><>

## Security-Arrangements

प्रधानमंत्री नरेन्द्र मोदी हुंदे जम्मू-कश्मीर दे दौरे शा पैहले समूलचे खित्ते च सुरक्षा बंदोबस्त निगार करी दित्ते गेदे ना। जरनैली शिड़क एन.एच-44 उप्पर सुरक्षा इंतजाम होर सख्त करी दित्ते गेदे न ते सुरक्षाबले दी बाद्दू तैनाती कीती गई ऐ। सेना गी हाई अलर्ट पर रक्खेआ गेदा ऐ ते व्यापक सुरक्षा योजना तैहत विशेष चौकियां स्थापित कीतियां गेदियां ना।

<><><><><><>

## Poonch-Operation

जम्मू-कश्मीर पुलस नै बन्नै कन्नै लगदे इलाके, पुंछ च उनें पाकिस्तानी आतंकिये खलाफ बड्डी कार्रवाई कीती ऐ जेडे पुंछ च छप्पियै आतंकी गतिविधियां चला'रदे हे। साहडे जिला संवाददाता नै जानकारी दित्ती ऐ जे पिछले 24 घंटे दौरान संगला, फागला, नाका-मंजरी, हरि बुद्धा, किरनी, मंधार ते कस्बा जनेह इलाके च 50 शा मते घरे च छापेमारी कीती गई ऐ। इस

अभियान दा मकसद आतंकी नेटवर्क गी तबाह करना ते राष्ट्र विरोधी गतिविधियें च मुलव्वस लोकें उप्पर कड़ी तक्क रखना ऐ।

<><><><><><>

### Property-Attach Ramban

आतंकवादी नेटवर्क खलाफ इक बड्डी कार्रवाई करदे होई प्रशासन नै पाकिस्तान दे गैर-कनूनी कब्जे आहले जम्मू-कश्मीर थमां अपनी भैड़ी गतिविधियां चला करदे आतंकवादी अली मोहम्मद उर्फ इब्राहिम शेख दी रामबन जिले च कोई डेढ कनाल राई-बाई आहली जिमीं गी जब्त करी लैता ऐ। एहू कार्रवाई गैर कनूनी गतिविधिएं दी रोकथाम सरबंधी कनून दे तैह्त कीती गई ऐ। साढे जिला संवाददाता नै जानकारी दित्ती ऐ जे जब्त कीती गेदी एहू जमीन, धर्मकुण्ड दे सुम्बर ग्रांउ च ऐ। इस गैंउ दा मकसद आतंकवादी गतिविधिएं पर नकेल कस्सना ते राष्ट्र दी सुरक्षा यकीनी बनाना ऐ।

<><><><><><>

### Monsoon-Session

सरकारै अगले म्हीने दी 21 तरीक थमां शुरु होने आहले संसद दे बरसांती आहले इजलास लेई कार्यक्रम दा ऐलान करी दित्ता ऐ। एह्दे शा पैहले बरोधी पार्टिं ऑपरेशन सिंदूर पर चर्चा लेई संसद दा बशेश इजलास सहने दी मंग कीती ही। नमीं दिल्ली च संसदी मामलें दे मंत्री किरेन रिजिजू होरें आखेआ जे एहू इजलास 12 अगस्त तगर चलोग।

ऑपरेशन सिंदूर दे बाद एहू संसद दा पैहला इजलास होग। इसी भारत नै पहलगाम आतंकी हमले दे बाद शुरु कीता हा। एह्दे च 25 भारती ते इक्क नेपाली नागरिक मारे गे हे। मगरा कीती गेदी परते आहले कार्रवाई च, भारती थेआरबंद बलें पाकिस्तान ते ओह्दे नजैज कब्जे आहले जम्मू-कश्मीर दे इलाकें च आतंकी ठकानें पर हमला करियै 100 शा मते आतंकियें गी मार मुकाया हा। पहलगाम आतंकी हमले दे बाद सरकार आसेआ सद्दी गेदी द'उं सर्वदलीय बैठकें च बक्ख-बक्ख सियासी पार्टिं दे नेताएं हिस्सा लैता हा।

<><><><><><>

## Hajj-Pilgrims

सलाना हज यात्रा अज्ज आधिकारिक रूप कन्नै शुरू होई गई, जेह्दे च 14 लक्ख शा मते अंतर्राष्ट्री हज यात्री मक्का च घरेलू प्रतिभागियें दे कन्नै शामिल होए। सऊदी प्रशासन नै बड़ी भारी गर्मी कन्नै निब्बड़ने लेई हज यात्रा दे आधुनिक व्यापक सुरक्षा तैयारियें परा पर्दा गोहाड़ेया ऐ। सऊदी अरब च भारती राजदूत होरें ज्हारें बद्धे भारती हजयात्रियें गी बधाई दिं'दे होई आखेआ जे कारोबारी दूतावास दिआं टीमां सऊदी अधिकारियें कन्नै मिलियै कम्म करै करदि'आं न। भारती हजयात्री "हज सुविधा" मोबाइल एप्लिकेशन ते समर्पित टोल-फ्री नंबरें दे माध्यम कन्नै मदाद हासल करी सकदे न।



## Viksit Krishi Doda

कृषि विभाग जम्मू दे डरैक्टर अरविंदर सिंह रीन होरें डोडा जिले दे भालरा ग्रांS दा दौरा लाया ते करसानें कन्नै गल्लबात कीती। विकसित कृषि संकल्प अभियान 2025 दे इक्क हिस्से दे तौरा पर आयोजित इस कार्यक्रम च उ'नें करसानें गी भलेआं अज्जै-कल्लै दे ते साईसी ढंग-तरीके अपनाने लेई गलाया तांजे उं'दी फसलें दे झाड़ च बाद्दा होई सकै। डरैक्टर होरें करसानें गी आखेआ जे ओहू नमीं तकनीकें गी अपनान ते अपनी औंदन च बाद्दा करना। ध्यानजोग ऐ जे विकसित कृषि संकल्प अभियान दे तैहत करसानें गी जागरूक बनाया जा'रदा ऐ तांजे ओहू राई-बाई दे खेत्तर च नमीं तब्दीलियां आह्निन्नयै इस खेत्तर गी मता तगड़ा बनाई सकन।



## Prog. Announcement

आकाशवाणी जम्मू दा क्षेत्रीय समाचार एकांश पर्यावरण सरबंधी कुल संसारी ध्याड़े दे मौके पर 20एं मिनटें दी इक विशेष परिचर्चा प्रसारित करा'रदा ऐ। एहू परिचर्चा 5 जून गी बड्डलै साड्डे 9 बजे प्रसारित होग। इस परिचर्चा च स्हाड़े परौहने होडन प्रो. यशपाल शर्मा डीन जीव विज्ञान विभाग, जम्मू यूनिवर्सिटी जिंदे कन्नै गल्लबात करडन स्हाड़े न्यूज एंकर श्रुति खजूरिया ते कुणाल श्रीवत्स। तुस एहू कार्यक्रम स्हाड़े इस्सै चैनल पर Medium wave 990 Kilo hertz ते FM 100 इशारिया 3 Mega Hertz पर सुनी सकदे हो।